

## Dogri Evening (NSD)

18-08-2026

### खबरां

1. पर्यावरण सहयोग पर सहमति गी बढ़ावा देने लेई नमीं दिल्ली च 12मीं ब्रिक्स पर्यावरण मंत्रियों दी बैठक आयोजित कीती जा'रदी ऐ।
2. बीजेपी नै उत्तर प्रदेश, पंजाब ते गुजरात लेई नमें राज्य प्रभारिएं ते सह प्रभारिएं दी नियुक्ति कीती
3. प्रवर्तन निदेशालय यानि ई.डी नै कर्नाटक लोक सेवा आयोग दे पेपर लीक घोटाले गी लेइयै छापेमारी कीती।
4. भारत मौसम विभाग नै अज्ज झारखंड, बिहार, छत्तीसगढ़, उड़ीशा ते उत्तर प्रदेश च भारी थमां मती भारी बरखा पौने दे असार दस्से न।
5. सरकार नै राष्ट्री खेड्ड पुरस्कार 2025 दी घोशणा कीती ऐ। ट्रेसजाली ते पुलेला गायत्री गोपीचंद सने 17 होर खडारिएं गी अर्जुन पुरस्कार लेई नामित कीता गेआ।
6. नमीं दिल्ली च चला'रदी BWF विश्व चैंपियनशिप च उन्नति हुड्डा होर म्यांमार दी शेट हतार थुजार गी हराइयै महिला सिंगल्स दे दुए राउंड च पुज्जी गेइयां न।

<><><><><><>

### BRICS

ब्रिक्स दी 12मीं पर्यावरण मंत्रियों दी बैठक नमीं दिल्ली दे भारत मंडपम च आयोजित कीती गेई। इस बैठक दा मकसद ब्रिक्स मुखें दे बश्कार पर्यावरणीय सहयोग गी मजबूत करने लेई आम सहमति बनाना हा। इस दो दिनें दी बैठक दे राएं सदस्य मुखें दे मंत्रियों वरिष्ठ अधिकारिएं, नीति निर्माताएं सने होरनें गी सतत भविक्ख ते पर्यावरण सहयोग लेई ठोस चर्चा च शामिल होने दा मंच प्रदान होआ। पर्यावरण, जंगलात ते जलवायु परिवर्तन दे केंद्री मंत्री भूपेंद्र यादव होरें इस बैठक दी अध्यक्षता कीती। भारत दी ब्रिक्स अध्यक्षता 2026 दा विशेषार ऐ लचीलापन, नवाचार, सहयोग ते स्थिरता लेई निर्माण। इस बैठक दा संबोधन करदे होई मंत्री यादव होरें आखेआ जे इस धरती गी सुरक्षित रखना ऐ ते असेंगी इंसाने दी भलाई गी प्राथमिकता देनी लोड़चदी जेदे लेई सरकार दी नियमें, नमीं तकनीके ते आम लोकें

गी रलियै कम्म करना होगं उनें आखेआ जे भारत नै 2005 थमां लेइयै 2022 तगर प्रदूषण फैलाने दी तीव्रता च 37 फीसदी थमां मती कटौती कीती ऐ। उनें आखेआ जे अध्यक्ष दे रूप च भारत इक्क खुल्ली, रचनात्मक ते आम सहमति आधारित गल्लबात गी बढ़ावा देने लेई बचनबद्द ऐ ते सबनें सदस्य मुल्ले दे दृष्टिकोण ते योगदान गी बड़ा महत्व दिंदा ऐ।

<><><><><><>

### BJP-State Incharges

बीजेपी दे राष्ट्री अध्यक्ष नितिन नबीन होरे उत्तर प्रदेश, पंजाब ते गुजरात लेई नमें राज्य प्रभारी नियुक्त कीते न। विनोद तावडे होरे गी उत्तर प्रदेश दा प्रभारी ते जगदीश इश्वरभाई पटेल होरे गी सह प्रभारी नियुक्त कीता गेआ ऐ। डा. सतीश पुनिया होरे गी पंजाब दा प्रभारी ते तरुण चुग होरे गी गुजरात दा प्रभारी नियुक्त कीता गेआ ऐ।

<><><><><><>

### India-Singapur

भारत-सिंगापुर मंत्री स्तर दी राउंड टेबल बैठक यानि आई.एस.एम.आर दा चौथा राउंड वीरवार गी सिंगापुर च आयोजित कीता जाहगा। भारत पक्ष थमां हिस्सा लैने आले मंत्रिये च वित्त मंत्री निर्मला सीतारमण, विदेश मंत्री डा. एस. जयशंकर उद्योग मंत्री पीयूष गोयल, इलेक्ट्रानिक्स ते आई.टी राज्यमंत्री जितिन प्रसाद शमल न। विदेश मंत्रालय नै आखेआ ऐ जे अपनी जात्तरा दरान एहू मंत्री अपने समक्ष ते सिंगापुर दे नेताएं कन्नै मलाटी करियै गल्लबात करंगन। आई.एस.एम.आर दी बवस्था नमें ते उभरदे क्षेत्रे सने सहयोग गी बढ़ावा देने लेई इक महत्वपूर्ण मंच ऐ। एहदी उद्घाटन बैठक सितंबर 2022 च नमीं दिल्ली च आयोजित कीती गई ही। एहदे मगरा दुई बैठक अगस्त 2024 च सिंगापुर च ते त्री बैठक अगस्त 2025 च नमीं दिल्ली च होई ही।

<><><><><><>

### Dy-COAS

सेना दे उप प्रमुख लेफ्टिनेंट जनरल राहुल आर. सिंह होरे आखेआ जे युद्ध दे बदलदे रूप नै सशस्त्र बले लेई जीरदी टेक्नोलॉजी दी सिखलाई ते उसी अपनाना जरूरी करी दिता ऐ। अज्ज नमीं दिल्ली च निगरानी ते इलेक्ट्रानिक्स पर भारती सैन्य समीक्षा गी संबोधित करदे होई उनें आखेआ जे युद्ध च खास करियै 2020 थमां तेजिया कन्नै खरा मता बदलाव आया ऐ। श्री सिंह होरे आखेआ जे निगरानी इक बहुस्तरीय संरचना च विकसित होई चुकी दी ऐ

जेदे पर अंतरिक्ष च मौजूद साधन, ब्हाई मंच, मानव रहित ब्हाई वाहन ते मानव खुफिया जानकारी ते समुंद्री प्रणालियां शामिल ना।

<><><><><><>

### ACC-MP

मध्य प्रदेश दे भिंड जिले च कल चिरें रातीं ग्वालियर भिंड इटावा राजमार्ग 719 पर इक पिकअप वैन ते ट्रक दी टक्कर च 8 लोकें दी मौत होई गई ते 23 लोक जखमी होई गए। खबरें दे मताबक, मजदूर भिंड दे गोहद थमां अपने धरें गी यू.पी दे लखीमपुर खेरी जा'रदे हे। 5 मजदूरें दी मौके पर गै मौत होई गई ते 3 लोकें गी ग्वालियर च इलाज आस्तै पजाया जा'रदा हा जित्थे उनें रस्ते च गै दम त्रोड़ी दित्ता।

<><><><><><>

### Trump-ECI

अमरीका दे राष्ट्रपति डोनाल्ड ट्रम्प होरें भारत दी मतदाता पंछान-पत्र आहली बवस्था दी सिफ्त करदे होई आखेआ ऐ जे एह अमरीका दी चुना प्रणाली लेई इक आदर्श मॉडल साबत होई सकदा ऐ। ट्रम्प होरें भारत दी चुना बवस्था गी चुनावी सुरक्षा दी इक शानदार मसाल करार दिता ते आखेआ जे भारती चुना आयुक्त ज्ञानेश कुमार कन्नै उन्दी हाल दी मलाटी मती जानकारी आहली रेही। उ'नें आखेआ जे भारती चुना आयुक्त होरें एह सोआल पुट्टेआ ऐ कि बिजन अपनी जायज पंछान दस्से दे कोई वोट पाने दा अधिकार दा इस्तमाल कियां करी सकदा ऐ।

<><><><><><>

### EC-Searches

प्रवर्तन निदेशालय नै कर्नाटक लोक सेवा आयोग पेपर लीक घोटाले कन्नै सरबन्धत कर्नाटक च केई थाहरें पर छापेमारी कीती ऐ। के.पी.एस.सी दे साबका अध्यक्ष शिव शंकरप्पा एस. साहूकार हुंदे पर सरकारी वैटनरी अधिकारिणं दी भर्ती आले पेपर गी लीक करने, ओएमआर शीट दे कन्नै छेड़छाड़ करने ते फ्ही मेदवार थमां 70-80 लक्ख रुपे दी रिश्वत मंगने दा आरोप ऐ। ई.डी नै आरोप बी लाया ऐ जे इक्क निजी कंपनी नै बिचैलिए दा कम्म कीता ऐ। एह्दे कन्नै सरबन्धी जांच च ई.डी नै शिवशंकरप्पा ते के.पी.एस.सी दे किश होर साबका सदस्यें दे आवासें ते निजी कंपनी कन्नै जुड़े दे दफ्तरें च छापेमारी कीती।

<><><><><><>

## Weather

तोआई, भारती मौसम विभाग नै झारखंड, बिहार, छत्तीसगढ़, पूर्वी मध्य प्रदेश, हिमाचल प्रदेश, उड़ीसा ते उत्तर प्रदेश च अज्ज भारी थमां मती भारी बरखा होने दे असार दस्से ना। मौसम विभाग मताबक उत्तराखंड, पच्छिम बंगाल, जम्मू-कश्मीर, लद्दाख, तमिलनाडू, पुदुचेरी, करायकल ते भारत दे उत्तर पूर्वी इलाकें च बी अगले दो दिनें दरान भारी थमां मती भारी बरखा होने दी मेद ऐ।

<><><><><><>

## Weather-Jammu

मौसम मैहकमे ने इस हफ्ते पूरे केन्द्र शासित प्रदेश दे केई सारें हिस्सें च हौली थमां दरम्याने दर्जे दी बरखा ते गरजी-लिश्कियै बरखा बरने दी पेशनगोई कीती ऐ। किश थाहरें पर खासकरियै बडुलै सवेला ते चिरे दपैहरी यां संजा'लै तेज बरखा होई सकदी ऐ। अज्जै थमां 19 अगस्त तोड़ी जम्मू खित्तें दे किश जिलें च बी इयै नेहा मौसम बने दे रौहने दी मेद ऐ, जिसले के कश्मीर खित्ते दिएं किश थाहरें पर तेज बरखा होई सकदी ऐ। लोकें गी तेज बरखा दे दौरान एहतियात बरतने लेई आखेआ गेआ ऐ।

<><><><><><>

## Sports-Award

सरकार नै राश्ट्री खेड्ड पुरस्कार 2025 दी घोशणा करी दिती ऐ। भारत दी प्रमुख महिला बैडमिंटन डबल्स जोड़ी त्रीसा जाली ते पल्लेल्ला गायत्री गोपीचंद सने बक्ख-बक्ख खेड्डें दे 15 होर खडारिएं गी अर्जुन पुरस्का प्रदान कीता जाह्ग। भारती फुटबाल दे दिग्गज खडारी इसायाह अरूमैनायागम होरें गी अर्जुन पुरस्कार लाइफटाइम कन्नै सम्मानित कीता जाह्ग। एथलेटिक्स कोच परवीह सिंह, बाक्सिंग कोच छोटे लाल यादव ते शूटिंग कोच नेहा नंद कुमार चैहान होरें गी द्रोणाचार्य पुरस्कार दित्ता जाह्ग। एह पुरस्कार खेड्डें च योगदान देने आहलें गी दित्ते जंदे ना।

<><><><><><>

## Puri-Pipeline

केंद्री पेट्रोलियम ते कुदरती गैस मंत्री हरदीप सिंह पुरी होरें आखेआ जे डेरगांव दिमापुर पाइपलाइन दे चालू होने कन्नै नागालैंड हुन पूर्वोत्तर गैस ग्रड ते राश्ट्री गैस ग्रिड कन्नै जुडी गेआ ऐ। पुरी होरें सोशल मीडिया पोस्ट च आखेआ जे एह चालू होना पूर्वोत्तर गी भारत दा विकास इंजन बनाने दी दिशा च इक ऐतिहासिक गैस ऐ ते इस क्षेत्र गी एकीकृत गैस आधारित अर्थ बवस्था दे कोल लेई औगा।

<><><><><><>

## SIA

प्रदेश जांच एजेंसी-एस.आई.ए नै नशीले पदार्थें कन्नै सरबन्धी गतिविधिएं च शामिल इक भगौड़े गी गिरफ्तार करी लैता ऐ। एह तकरीबन 4 बरें थवां फरार हा। एहदा नांऽ मनोज कुमार भट्ट उर्फ पिंटू ऐ जेहड़ा रिहाड़ी कालोनी जम्मू दा बसनीक दस्सेआ जा'रदा ऐ। कब्जा रेखा राएं नशीले पदार्थें दी तस्करी आहले ते आतंकवादी गतिविधिएं च शामिल मामले च वांछित हा। एसआईए नै आखेआ ऐ जे पाकिस्तान ते पाकिस्तान दे नजैज कब्जे आहले कश्मीर आधारित हिज्बुल मुजाहिदीन लेई कम्म करने आहलें कन्नै जुड़े दे इक नेटवर्क दा पता लगा ऐ। होर ब्यौरे गी अजें बलगेआ जा'रदा ऐ।

<><><><><><>

## Mens-Cricket

मर्दे दे क्रिकेट च खीरी रिपोर्ट तगर गाले दे पैहले टेस्ट दे चौथे दिन भारत नै श्रीलंका दे खलाफ 7 विकेटें दे नुकसान पर 181 रन बनाए। एहदे शा पैहले भारती गेंदबाजें मेजबान टीम गी उंदी पैहली पारी च 284 रन पर समेटी दित्ता।

<><><><><><>

## BWF-Badminton

बी.डब्ल्यू.एफ बैडमिंटन विश्व चैंपियनशिप च भारत दी उन्नति हुड्डा होरें नमीं दिल्ली दे इंदिरा गांधी इंडोर स्टेडियम च म्यांमार दी थेट हतार थुआर गी सिद्धे गेम च हराइयै महिला सिंगल्स दे दुए राउंड च पुज्जी गेइयां। कड़े मुकाबले आले पैहले गेम च भारत शटलर नै अपने बरोधी गी 22-20 कन्नै पिच्छे छोड़ी दित्ता बल्कि दुए गेम च उनें 21-16 कन्नै आसानी कन्नै जित्त हासल कीती। राउंड आफ 32 च उंदा मुकाबला कनाडा दी मिशेल ली हुंदे कन्नै होग।

<><><><><><>

## BJP-Vandematram

बीजेपी नै स्वतंत्रता दिवस समारोह दरान नमीं दिल्ली दे अखिल भारती कांग्रेस कमेटी दे मुख्यालय च राष्ट्र गीत वंदे मातरम दा अनादर करने लेई कांग्रेस पार्टी पर निशाना साधेया ऐ। नमीं दिल्ली च इक संवाददाता सम्मेलन गी संबोधित करदे होई बीजेपी प्रवक्ता रविशंकर प्रसाद होरें आखेआ जे कांग्रेस पार्टी गी स्वतंत्रता आंदोलन दा संरक्षक होने दा दावा बंद करी देना लोड़चदा, जेकर ओहू राष्ट्र गीत दा सम्मान नेई करी सकदे। उनें दावा कीता जे कल जिसलै कांग्रेस पार्टी दे राष्ट्री अध्यक्ष मल्लिकार्जुन खड़गे गोवा गेदे हे, उते बी उनें पार्टी दे कार्यक्रम च वंदे मातरम च छड़े 2 पैरे गाए हे।

<><><><><><>

## Aadhaar

भारती विशिष्ट पंछान प्राधिकरण-यू.आई.डी.ए.आई नै बच्चें ते आधार बायोमीट्रिक अपडेट दे अभियान च बड़ी उपलब्धि हासल कीती ऐ। मुख्य भरै च हुन तगर 2 करोड़ थमां मते बच्चें दे बायोमीट्रिक अपडेट कीते जाई चुके दे न। एहू खास अभियान पिछले बरे सितंबर च शुरू कीता गेआ ह। बच्चें दे 5 बरें जां फही 15 बरें दी उम्री च बायोमीट्रिक अपडेट करना जरूरी ऐ। एहदे तैहत इक लक्ख 56 जहार थमां मते विद्यालयें च बच्चें गी आधार बायोमीट्रिक दिती गेई। एहदे तैहत बच्चें दे आधार च छड़ा नां, पता ते फोटू जनेई जानकारी दर्ज कीती जंदी ऐ।

<><><><><><>

## POJK

पाकिस्तान दे कब्जे आहले जम्मू-कश्मीर च बददे तनाव दे चलदे यूनाइटेड कश्मीर पीपल्स नेशनल पार्टी नै क्षेत्र च पाकिस्तानी बलें आसेआ मानवाधिकारें दी खलाफवर्जी आहली भेठा अंतरराष्ट्री समुदाय दा ध्यान आकर्षित कीता ऐ। यू.के.पी.एन.पी नागरिकें दी मौत ते घायल होने, मनमानी गिरफ्तारिएं, जबरन गुमशुदगी ते संचार बवस्थ बंद कीते जाने पर चिंता जताई। संगठन नै शांतपूर्ण राजनीतिक कार्यकर्ताएं ते मानवाधिकार रक्षकें दी आवाजाई पर रोक लाने ते उंदे खलाफ दंडात्मक कार्रवाई पर बी चिंता जाहर कीती।

<><><><><><>

## Rishav Pant Record

विकेट कीपर बल्लेबाज ऋषभ पंत होर टेस्ट क्रिकेट च 100 छक्के मारने दा मील दा पत्थर पूरा करने आले पैहले भारती ते दुनिया दे चौथे खडारी बनी गे न। पंत होर अज्ज श्रीलंका दे खलाफ शुरूआती मैच दे चौथे दिन सबनें शा तेज 100 छक्के लाने आहले खडारी बी बनी गे। पंत होरें एहू मकाम अपने छड़ा 51में मैच च गै हासल करी लैता ऐ जेल्ले के इंग्लैंड दे साबका कप्तान बेन स्टोक्स नै एहू मुकाम अपने 82में टेस्ट च हासल कीता हा।

<><><><><><>

## Search-Operation

सुरक्षाबलें उधमपुर-रियासी ते कठुआ जिले च संदिग्ध आवाजाई बारै थहोई दी रिपोर्ट पर कार्रवाई करदे होई केई सारी थाहरें पर छापेमारी शुरू कीती ऐ। आकाशवाणी जम्मू दे संवाददाता दी रिपोर्ट मूजब पुलस ते सी.आर.पी.एफ नै सांझे तौर पर उधमपुर दे तलोट ग्रांड च इलाके दी घेराबंदी करिए तपाशी अभियान चलाया। एहू कार्रवाई इक बसनीक दे घर दे दरवाजे गी खट-खटाने ते रूट्टी मंगाने मगरा चलाई गई। दस्सेआ जा करदा ऐ जे संदिग्धें शाल लपेटे दे हे ते ओहू खुबन आहली भेठा चली गए। बसनीकें मगरा सुरक्षाबलें गी सौहगा कीता। रियासी जिले दे जंगली इलाके च ते कठुआ जिले दे हीरानगर सैक्टर च अंतरराष्ट्री बन्ने कन्नै लगदे इलाकें च तपाशी अभियान चलाए गए न। होर ब्यौरे गी अजें बलगेआ जा'रदा ऐ।

<><><><><><>